

Théodore Aubanel

Lou Rèire-soulèu



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

ENVOUCACIOUN

La Pouèsio, à grand cop d'alo,
Plus aut, toujours plus aut, escalò;
Vai jusquo à Diéu, vai monte vòu;
La Pouèsio, aiglo sublimo,
Quand trèvo sus li bèlli cimo,
Queto amo fièro noun trelimo
De l'acoumpagna dins soun vòu?

Tout mor; mai elo, sèmpre vivo,
Estrassant la niue e li nivo,
Jouino coume un soulèu levant,
Coume un enfant dóu cèu divino,
Trelusis, e tout s'enlumino,
E lou que dins la vau camino
Saludo en ié passant davans.

Saluden la noblo divesso!
Es lou bonur, es la sagesso
D'èstre si prèire au tèms que sian;
Quand dins la pússo tout debano,
Quand lou laid pico emé si bano
Pèr chanja lou tèmple en cabano
Ounte se viéuton li bóumian.

Es bèu d'ista dre dins la foulo
Que se rebalo e que s'engoulo
Sai pas monte; de garda siéu
Sa fe, soun cor; quand revouluno
L'aurige e que l'espèr degruno,
Quand se crèi plus au clar de luno,
Quand se crèi plus au tron de Diéu.